



mjesečni Bilten

omladinska mreža bosne i hercegovine



januar
siječanj
2021

260

Dragi prijatelji/ce,

Predstavljamo vam **januarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net




SADRŽAJ

Aktivnosti u januaru	2
Planovi za februar	4
Aktivnosti članova mreže	5
Saopštenja/informacije/donatori/pozivi.....	11

Uživajte u čitanju!

AKTIVNOSTI ORC/HCA U JANUARU 2021.

Emitovanje filma „Efendijin zavjet“ na BHT i NEON TV– CAT BiH



CAT Bosna i Hercegovina je zajedno sa timom mladih snimatelja i režisera iz Una Storia snimila prvi dokumentarni film!

Snimljen je film o tuzlanskom Muftiji Muhamedu Šefketu ef. Kurtu pod nazivom „Efendijin zavjet“.

Zahvaljujući Muftiji u Tuzli nije bilo masovnih zločina, a što je ujedno i jedan od važnijih istorijskih događaja i inspiracija za ovaj film.

Pridružite nam se na putovanju kroz istoriju.

Film „Efendijin zavjet“ se emitovao 31.01.2021. godine na BHRT-u i na Badnji dan se emitovao na NEON TV.

Uskoro planiramo da film dignemo i na YOUTUBE, a ove godine se očekuje još projekcija, od kojih će prva biti održana u Zenici 5. Februara tokom „Sedmice Međureligijskog dijaloga

CAT – Bosna i Hercegovina

“Nadam se da Vas ovaj mail zatiče u dobrom raspoloženju...”

Ja:



Tokom mjeseca januara, nastavili smo sa našim redovnim aktivnostima u sklopu projekta „CAT – Bosna i Hercegovina“.

Naše mačke su nastavile da oduševljavaju javnost na društvenim mrežama.

Ukoliko još uvijek ne pratite naše mačke – pozivamo vas da to učinite na:

[Facebook](#), [Web Portal](#), [Instagram](#) i [Youtube kanal](#).

CAT Patrola: Biljana Andrijević, Perpetuum Mobile Banja Luka

Bilja kako je mačkice zovu od milja, naša je nova gošća!

Bilja je pravica koja tu i tamo našvrlja poneki crtež s namjerom da usreći ljude koje voli.

Ostaviti trag na ovom svijetu nešto je što je inspiriše i daje snagu da istraje u svemu.

Ovo nije još jedan #FakeTaxi, ovo je #CatPatrola! [VIDEO](#)



PodCat sa Malikom

* Gošća novog #PodCat-a sa Malikom bila je Naida Salković, članica PR tima Tuzla Brain Week-a.

Šta je to Tuzla Brain Week, kad i kako je započela cijela priča, te koje su zanimljivosti i činjenice o ljudskom mozgu možete pogledati u novoj epizodi PodCata sa Malikom. [VIDEO](#)



Gost nove epizode #PodCat-a sa Malikom bio je Jasmin Đulović, u društvu poznat kao i Džasmin.

Jasmin već duži period svojim humorom uljepšava dane svojoj publici i to je ono što ga ispunjava, sa Malikom je razgovarao o mnogim aktuelnim temama, o političkim aferama u Bosni i Hercegovini i o samom mentalitetu ljudi sa ovih prostora. O čemu su još Malik i Jasmin razgovarali pogledajte u nastavku. [VIDEO](#)



Disclaimer: Izneseni stavovi gostiju u emisijama nisu nužno i stavovi Cat Bosna i Hercegovina.

REDOVNE AKTIVNOSTI ORC I HCA TUZLA

Tokom januara radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA FEBRUAR 2021.

- Nastavak aktivnosti u okviru projekta CAT. Sa novim ciklusom i aktivnostima U okviru ovoga ćemo emitovati dokumentarni film „Efendijin zavjet“ na drugim TV stanicama u BiH, al i još mnogo aktivnosti, o kojima ćemo vas upoznati na našim stranicama.
- Nastavak aktivnosti u okviru ALF Mreže BiH. U okviru ovoga ćemo u narednom periodu održati izbornu skupštinu ALF BiH, na kojoj će, između ostaloga biti izabrani i članovu Upravnog Odbora ALF BiH
- Početak partnerskog projekta „Youth Rule o Law LAV (YroLL), čiji je nosilac Udruženje „Ja BiH u EU“ iz Sarajeva, a podržan je od strane Evropske unije. Projekat će trajati 30 mjeseci
- Nastavak na fundraisingu.
- I, ako Bogda početak realizacije rekonstrukcije krova iznad naših kancelarija, koji smo dobili od grada Tuzla na korištenje, te otvaranje Centra,

AKTIVNOSTI ČLANICA OMLADINSKE MREŽE BiH



Udruženje za društvena istraživanja i komunikacije - UDIK

Ul. Grbavička 51, 71000 Sarajevo

Tel./fax: +387 33 978 600; +387 33 978 605

E-mail: official.udik@outlook.com; official.udik.brcko@outlook.com

Web: www.udik.org; www.udik-brcko.org

Građanska inicijativa za sjećanje i komemoracije



GISK

Kako bi nastavilo promovirati aktivnu ulogu mladih u društvu, kao i važnost saradnje vladinog i nevladinog sektora, Udruženje za društvena istraživanja i komunikacije je pokrenulo mrežu pod nazivom Građanska inicijativa za sjećanje i komemoracije (GISK). Cilj ove inicijative jeste zajednički građanski i politički angažman u kulturi sjećanja, povećanje društvene kohezije i raznolikosti u Bosni i Hercegovini. Aktivirajući i edukujući lokalnu zajednicu stvara se prostor za kritičko razmišljanje i razmjenu iskustava na poljima memorijalizacije i

komemoracije žrtava proteklog rata. Proširenjem i jačanjem GISK mreže nastavlja se UDIK-ovo zagovaranje nepristrasne građanske memorijalizacije u znak sjećanja na žrtve rata u Bosni i Hercegovini i to kroz mrežu različitih aktivista u lokalnim zajednicama u našoj zemlji. Budite dio naše inicijative i svojim angažmanom doprinesite boljem suživotu u svojoj sredini. Prijave šaljite na e-mail: prijava.gisk@gmail.com. Više informacija potražite na stranici www.gisk.info.

Sarajevo: Sjećanje na žrtve holokausta

U povodu 27. januara, Dana sjećanja na žrtve holokausta, Udruženje za društvena istraživanja i komunikacije (UDIK) je predstavilo novu knjigu naziva „Sarajevo: Sjećanje na žrtve holokausta“. Knjiga dokumentuje imena palih boraca, građana Sarajeva u NOB-u, poginulih boraca za oslobođenje Sarajeva i žrtava fašističkog terora. Spisak imena je dobijen od lista Oslobođenje koje je tu istu listu objavilo prošle godine kada je u sarajevskoj katedrali održana misa za Bleiburg. O procesu prikupljanja podataka, u uvodnom dijelu ove knjige pisala je Vildana Selimbegović, glavna i odgovorna urednica lista Oslobođenje. Za potrebe ove knjige hazan sarajevske sinagoge Igor Bencion Kožemjakin je napisao tekst naziva Jevreji Sarajeva, žrtve nacističkog i ustaškog terora, a koji se nalazi na kraju knjige.





OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitac je nastavila sa svakodnevnim interaktivnim i online aktivnostima. Mlađi učesnici su radili kreativne i edukativne stvari prilagođene uzrastu, uz pomoć lokalnih i međunarodnih volontera. Ovaj mjesec su radili: crtanje puža pomoću šake, crtanje morskih životinja, pravili su miša od papira, zvijezde i dekoracije. Gledali su video projekcije priča, pjesama i bajki, te crtane filmove sa porukama o prijateljstvu: Novogodišnja Jelka, Priča o Snješku Bijeliću, Pipi Duga Čarapa, Mrav dobrog srca i Šaptač – mačija priča o toleranciji i prijateljstvu. Nastavili su sa azbukom i do sada su naučili pisati slova П, Р, С i riječi koje počinju tim slovima, te su crtali pojmove koji počinju na određeno slovo. Na muzičkim radionicama su učili i vježbali pjesmice: Djeca su ukras svijeta I i II dio, Kišobran za dvoje te su vježbali razne muzičke ritmove. Na radionicama engleskog jezika su nastavili raditi pridjeve/suprotnosti, morske životinje, svečana hrana i slastice, zima i zimska odjeća, tolerancija, prijateljstvo, ljubav. Kao i prethodnih mjeseci Svitac je u okviru redovnih aktivnosti intenzivno radio na temi higijena i posvetio joj posebnu pažnju. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.



Uzrast 13+ je učestvovao u online radionicama na teme: omiljeno mjesto u gradu, ko su influenseri i kakav uticaj imaju na naš život, stripovi i pop kultura, šta je populizam, šta želim u 2021. godini. Na ovaj način želimo mladima pružiti siguran i neutralan prostor, u kojem mogu reći svoje mišljenje.

Na engleskim i njemačkim radionicama smo posvetili pažnju gramatici i kompleksnijim rečenicama uz upotrebu povratnih glagola i opisnih pridjeva. Pored toga smo vježbali svakodnevnu komunikaciju i radili na projektima i prezentacijama na teme - socijalne mreže: prednosti i mane interneta, pomoć u kući, omiljeni sport i praznici sa porodicom.

Koordinator radionica je bio Adin Midžić uz asistenciju lokalnih i EVS/ESC međunarodnih volontera.

Radionice gitare

Učesnici su nastavili rad na pjesmama, etidama i kompozicijama kao što su: "Sultans of Swing" (Dire Straits), "Na mostu" (J. Jovičić), etide No. XIII, XVI, XXI (M.M. Ponce), "Valcer sa varijacijom" (F. Carulli), "Gavota" (Cornelius Gurlit) i Bella Ciao.

Radionice Sambe

Rad sa grupom se odvijao online. Kreirani su sedmični muzički kvizovi za učesnike, kako bi se održao kontakt, pružio obrazovni sadržaj i zadržao interes učesnika za trenutne i predstojeće aktivnosti. Kviz je obuhvatao kompozitore klasične muzike, ulogu žena u istoriji raznih muzičkih žanrova i kviz o stripu kao devetoj umjetnosti. Takođe, održane su dvije radionice u Omladinskom centru uz poštovanje preporučenih mjera (nošenje maske, dezinfekcija ruku, fizička distanca). Na ove dvije radionice učesnici su osmislili novu "kompoziciju" radnog naslova "Walter".



Za februar se planira nastavak svih aktivnosti Omladinske organizacije Svitač.



Institut za
razvoj mladih KULT



Ul. 4. Viteške brigade

34 – 36 BA, 71210 Ilidža, Sarajevo

Tel: +387 33 778 778.

Fax: +387 33 778 79

E-mail: kult@mladi.org, web:
www.mladi.org

Predsjednik Federacije BiH Marinko Čavara razgovarao sa predstavnicima Instituta

Predsjednik Federacije BiH Marinko Čavara je 18.01.2021. u Sarajevu razgovarao s predstavnicama Instituta za razvoj mladih KULT. Ispred Instituta sastanku su prisustvovala Šeherzada Halimić, izvršna direktorica i Katarinom Vučković, voditeljica Odjela za politike prema mladima i rad s mladima.

U uvodnom dijelu predstavljene su aktivnosti Instituta u oblasti politika prema mladima, na kojima Institut skoro dva desetljeća radi i na taj način **podržava razvoj i provođenje mehanizama** za pitanja mladih u cijeloj Bosni i Hercegovini.



Voditeljica Odjela za politike prema mladima i rad s mladima, Katarina Vučković, posebno je istaknula važnost usvajanja Strategije prema mladima u Federaciji BiH. Također, istaknula je kako je Institut, unatoč pandemiji koronavirusa, u protekloj godini uspješno realizirao planirane aktivnosti, sukladno epidemiološkim mjerama.

Predsjednik Federacije BiH Marinko Čavara **čestitao je** predstavnicama Instituta na uspješnom radu, te izrazio punu **podršku radu Instituta** koji daje veliki doprinos u kreiranju i provođenju politika prema mladima u Federaciji BiH, ali i cijeloj BiH.

Poboljšanje ljudskih prava u bh. Privrednom sektoru Deset novih kompanija usvojilo Povelju o poštivanju ljudskih prava u poslovanju

20.01.2021 je u prostorijama najvećeg co-working prostora u Bosni i Hercegovini „Tershouse“, deset novih kompanija **prihvatilo i usvojilo Povelju o poštivanju ljudskih prava u poslovanju**.

Povelja se sastoji od **15 tačaka** koje se tiču sprječavanja narušavanja ljudskih prava, uključivanja zainteresiranih strana radi uvažavanja njihovog glasa i potreba, opredijeljenosti za jednak odnos prema svima, očuvanja radnog okruženja, zabrane prinudnog rada i zabrane umiješanosti u trgovinu ljudima, te prava na sistem komunikacije koji maksimalno štiti povjerljivost za sve prijave zaposlenih

Povelja o poštivanju ljudskih prava u poslovanju **je uz financijsku podršku Evropske unije** razvijena u okviru projekta „Poboljšanje ljudskih prava u privrednom sektoru u BiH“, od strane **Instituta za razvoj mladih KULT**, u saradnji s Udruženjem poslodavaca FBiH.

Povelja o poštivanju ljudskih prava u poslovanju nastala je na **bazi vodećih principa Ujedinjenih nacija i prvi je korak ka kreiranju državnog akcionog plana o poštivanju ljudskih prava u poslovnom sektoru**. Prije izrade same Povelje, provedeno je istraživanje kako bi se utvrdilo koliko su kompanije uopće svjesne važnosti poštivanja ljudskih prava. Rezultati istraživanja pokazuju da kompanije, posebno male, nisu svjesne da i one **svojim poslovanjem mogu ugroziti ljudska prava**.

„Odlučili smo se na potpisivanje ove Povelje s obzirom da je to jedno od osnovnih postulata našeg poslovanja, ali i treba biti srž dobrog poslovanja svih kompanija kako u BiH, tako i u svijetu. Izuzetna nam je čast da je Instituta za razvoj mladih KULT uspio implementirati ovakvu inicijativu i Bosni i Hercegovini“, izjavila je Sara Lerota, uposlenica Ministry of Programming.

Predstavnici ambasada u BiH i mladi političari saglasni važnosti demokratskih procesa u Bosni Hercegovini

Predstavnici **tri ambasade** u BiH 29.1.2021. razgovarali su sa 12 mladih političara iz 8 političkih stranaka, a koji su dio lokalne vlasti u 11 zajednica u BiH. Mladi političari bili su polaznici Obuke Uči, misli i djeluj za omladinske političke liderice i lidere UMiDp, koju već tri godine organizira **Institut za razvoj mladih KULT**.

Učešće u obuci UMiDp uzelo je ukupno **63 mladih političara** kroz tri generacije, a na posljednjim lokalnim izborima 13 njih je osvojilo mandate za općinska i gradska vijeća, odnosno skupštine opština, a jedan polaznik je osvojio mandat za načelnika opštine. Svi polaznici obuke u trenutku pohađanja bili su **mlađi od 30 godina** i dolaze iz **15 različitih političkih stranaka** i iz svih dijelova Bosne i Hercegovine. Njihovi rezultati na posljednjim izborima pokazuju potencijal koji mladi imaju u političkim procesima, ali i važnost neformalnog obrazovanja.

Ambasador Velike Britanije u BiH, Nj.E. Matt Field izjavio da su ovi mladi ljudi dobar primjer za učešće u lokalnoj politici čak i za zajednice u Britaniji i napomenuo da je rodna ravnopravnost vrlo važna te da je potrebno **povećati učešće žena** u političkom životu u BiH.

Rezultati na posljednjim izborima, gdje je 13 mladih političara i političarki koji su sudjelovali u obuci za mlade političke lidere i liderice, osvojili mjesta u općinskim i gradskim vijećima, pokazuju potencijal koji mladi ljudi imaju u političkim procesima i važnost neformalnog obrazovanja“, izjavila je **Lisa Cumman, druga sekretarka Ambasada Švedske u BiH**.

Događaju je prisustvovao i **ambasador Kraljevine Nizozemske** u BiH, Nj.E. Reinart Vos, koji je mladima poručio da trebaju **iskoristiti priliku** koju imaju i zaštititi vladavinu prava i političke i izborne procese u zemlji.

Slavko Tešić bio je jedan od polaznika **prve generacije Obuke UMiDp**, a danas obnaša poziciju **načelnika Opštine Pelagićevo**. Slavko kaže da mu je obuka u velikoj mjeri pomogla u njegovom političkom angažmanu i konačnom osvajanju mandata.

Polaznici na obuci kroz **tri petodnevna modula** imaju priliku učiti o političkom sistemu BiH i djelovanja u njemu, o razvoju političkog imidža te o političkom zagovaranju i pregovaranju za rješavanje problema i potreba mladih. Cilj obuke je da mladi političari postanu **nosioi pozitivnih promjena** u BiH i primjer odgovornog bavljenja politikom. Podršku Institutu prilikom provođenja prve tri generacije obuke pružila je Ambasada Švedske u BiH.



INFORMACIJE / DONATORI / POZIVI



Proglas Fondacije CURE o nultoj toleranciji na nasilje

Fondacija CURE je nastala s ciljem kreiranja društva u kojem se ne toleriše nasilje, diskriminacija i mržnja. Kroz svoj petnaestogodišnji rad Fondacija CURE promovira kulturu nenasilja kako bi doprinijele većem kvalitetu svakodnevnog života žena i drugih manjinskih i marginalizovanih grupa. Članice Fondacije CURE su u svoj svojoj različitosti okupljene oko jedinstvenog stava, a to je da nema kompromisa sa nasiljem. Mnogo smo potrešene s nedavnom izjavom glumice Milene Radulović, ali isto tako smo ponosne na Milenu i sve druge žene koje su javno istupile i pronašle hrabrost da pričaju o nasilju, seksualnom uznemiravanju i silovanju. Zato i zbog podrške #NisamTrazila i cjelokupnom pokretu žena, djevojaka i djevojčica koje su digle svoj glas smo odlučile da javno istupimo sa proglasom o NULTOJ toleranciji na nasilje.

RAZLOG NASILJA – Uzroci nasilja ne leže u alkoholu, drogama, izboru partnera/ke, mjestu i vremenu gdje se nasilje desilo ili se događa. Razlog nasilja leži u otkrivanju njegovog uzroka. Uzroci nasilja leže u patrijarhalnom sistemu koji su često refleksija i dominacija muške moći. U svim oblicima nasilja suština jeste zloupotreba moći i potreba za kontrolom žena i ženskih tijela. Patrijarhat, seksizam i nasilje opstaje zbog mreže osoba koje omogućuju da se to desi, tako što ignorišu, ne reaguju i traže opravdanje za nasilnike.

DEŠAVA SE SVIM ŽENAMA – Nasilje nad ženama je direktan produkt patrijarhalnog društva i zato se može dogoditi bilo kojoj ženi bez obzira na godine, socio – ekonomski status, nivo obrazovanja, mjesta boravka, ličnog izgleda, načina oblačenja, te se dešava u javnom, privatnom i virtuelnom prostoru od strane poznatih, nepoznatih osoba, partnera kao i od strane članova porodice.

NE POSTOJI OPRAVDANJE ZA NASILJE – Sve dok se propituju žene koje proživljavaju nasilje (zašto nije uradila nešto, zašto je bila tamo, što je obukla mini suknju, zašto nije vikala i sl.), opravdava se seksizam i nasilje, i nema društvene (a često ni pravne) osude. Onog trenutka kada norma postane rečenica: „Počinilac, seksista, nasilnik je kriv i ne postoji opravdanje za takvo ponašanje!“, mi ćemo biti spremni/e da krenemo u novi dio historije u kojem će žene prvo biti ohrabrene da javno reaguju i da ne budu osuđene za to.

TIČE SE SVIH – Patrijarhalni stavovi pokušavaju sve oblike nasilja nad ženom smjestiti u privatnu sferu. Time što o nasilju ne govorimo mi nasilje dopuštamo i opraštamo. Minimaliziramo posljedice nasilja nad ženama. Nasilnicima i silovateljima dajemo društvenu dozvolu da nastave sa nasiljem. „Lično je političko“ zato borba protiv nasilja treba biti dio javne sfere. Idemo ohrabriti jedna drugu da o njemu govorimo, tako se zajedno suprotstavljamo nasilju

NASILJE I SEKSIZAM NISU ŠALA – Seksisti, nasilnici i oni koji ih podržavaju često koriste "šale" da provuku svoj seksizam, te da na taj način seksualno uznemiravanje i nasilje ne shvati se ozbiljno. Sa „seksističkim šalama“ se normalizuje seksizam, nasilje, diskriminacija, te nasilje postaje norma u društvu koji motiviše nasilnika da nastavi s nasilnim aktima.

ŽENSKO TIJELO NE PRIPADA MUŠKARCIMA - Tretiranje ženskog tijela kao seksualnog objekta se stopio sa kulturom i tradicijom. Žensko tijelo je najpolitiziranije pitanje društvenog uređenja (po čemu se razlikuje ljevičarska i desničarska politika), jer se politička koplja lome preko žena i njihovih tijela. Muškarci odlučuju u ime žena o njihovim slobodama, životima, tjelesnoj autonomiji, kretanju, načinu oblačenja,

obrazovanju i pravima na posjedovanje sebe! Odluka koja bi trebala biti individualna odluka, bez miješanja države ili vjerskih lidera, je dovela do toga da se žene moraju pravdati za sve što odluče raditi sa svojim životima ili tijelima, a kad im se načini nasilje moraju se pravdati društvu. Ženska tijela su svakodnevno bojno polje. Razorena tijela koja vrište pod svakodnevnim raznim oblicima nasilnih činova.

FONDACIJA CURE PORUČUJE SVIM ŽENAMA, DJEVOJKAMA I DJEVOJČICAMA:

NISI TRAJILA – Nije bitno gdje si bila, s kim si bila, šta si radila, šta si obukla, šta si pila... Važno je da znaš da nije do tebe i ti nisi htjela i nisi tražila da ti se to desi. Nasilnik i seksista je tražio da te seksualno uznemiri i počini nasilje. Nasilnik je odgovoran za nasilni akt prema tebi, uvijek On ne TI.

NIJE TVOJA ODGOVORNOSTI – To što patrijarhat uči djevojčice, djevojke i žene da se zaštite od nasilja i nasilnika, a ne uče, dječake i muškarce da ne vrše nasilje, nije tvoja odgovornost. Za počinjeno nasilje odgovoran je nasilnik i seksista, odgovoran je obrazovni sistem koji nije kreirao mehanizme za NULTU toleranciju na nasilje, odgovorni su sudovi koji ne kažnjavaju počinitelje, odgovorna je država koja nema mehanizme stvarne osude nasilnika. Nisi ti odgovorna što je sistem kreiran da dodatno viktimizuje ženu koja proživljava ili je preživljela nasilje, a pri tome kreira opravdanje za nasilnika i seksistu.

NISI KRIVA – Najčešća emotivna reakcija na nasilje je strah, stid, krivica, osjećaj izdaje, ljutnja, poricanje, opravdanje... Okrivljivanje osobe koja je proživjela nasilje direktno oslobađa počinioca nasilja.

TVOJE TIJELO - TVOJE PRAVO - TVOJE TIJELO - TVOJA SLOBODA Kroz patrijarhat mi žene smo naučene da se udaljavamo od svojih tijela, da ne posjedujemo sebe i na taj način kreirano je društveno okruženje koje zahtijeva da šutimo kad nam se nešto loše desi. Uče nas da skrivamo svoja tijela (u privatni prostor ili načinom oblačenja - kako bismo se zaštitile od nasilja), kreiramo društvo u kojem žene preuzimaju odgovornost za nasilje koje im se događa, što je pogrešno. Ti posjeduješ svoje tijelo i samo ti imaš pravo da donosiš odluke za sebe i svoje tijelo.

TVOJE ISKUSTVO JE TVOJA PRIČA - Svaka žena pojedinačno ima svoj proces i trebamo razumjeti da neke žene nisu spremne govoriti o proživljenom seksualnom uznemiravanju, zlostavljanju i bilo kojem obliku nasilju. Patrijarhalno mizoginična sredina je kreirala toleranciju na nasilje gdje žene ako progovore javno o nasilju, seksualnom uznemiravanju, društvo osuđuje žene, smatraju je krivom, propituju moralnost i govore da je žena izazvala nasilje. Na taj način kreiramo društveno okruženje gdje su žene natjerane da ne govore o svom iskustvu nasilja.

NISI SAMA – Svim ženama /djevojkama/ djevojčicama koje su našle snagu da javno progovore o seksualnom uznemiravanju i zlostavljanju iskazujemo poštovanje. Svaka žena je bitna, svaka priča je važna. Svojim javnim govorom ste pokazale hrabrost i dale do znanja da nismo same i da smo podrška jedna drugoj. Tvoja priča uvijek je podrška drugoj da iznese svoju priču. Zato Bravo Ti!

TAMO GDJE JE OPRESIJA, TU JE I OTPOR – Koliko god nas ugnjetavali, prigušili, potisnuli, ignorisali, mučili ili/i prozvali ponižavajućim imenima opresivni sistem iznjedri snažne i hrabre žene i djevojke koje bez obzira na eru, kulturu, politiku pokazuju otpor. Žene koje će javno reći istinu o svom iskustvu nasilja, žene koje će zahtijevati slobodu za sebe i za sve žene. Žene koje kreiraju pokrete solidarnosti i podrške za sve žene. Pokrete koji nastaju iz potrebe da se konačno progovori o seksualnom uznemiravanju i seksualnom zlostavljanju kojeg žene trpe u javnom prostoru.

ZATO MI ZAHTIJEVAMO:

NULTA tolerancija na sve oblike nasila - Zahtijevamo da država preuzme ključnu ulogu u prevenciji i borbi protiv nasilja nad ženama, te da se ojača cjelokupni sistem podrške i omogući integraciju žena i djece koja su preživjela nasilje u društvo i zajednicu. Zahtijevamo uspostavljanje državne statistike o svim slučajevima femicida i svim oblicima nasilja nad ženama, da porast slučajeva seksualnih uznemiravanja, nasilja i femicida bude shvaćen ozbiljno. Zahtijevamo da nasilnici budu adekvatno

kažnjeni, da žene koje su doživjele nasilje budu zaštićene i da policija, tužilaštvo i sudovi postupaju brzo i efikasno, i da o ovim slučajevima odlučuju u hitnom postupku. Zahtijevamo da počinitelji ratnog i mirnodopskog seksualnog nasilja budu najstrožije kažnjeni, da preživjele seksualnog nasilja prestanu biti stigmatizirane i viktimizirane tokom sudskih postupaka, da dobiju neophodnu podršku sistema i institucija, ali i da društvo preuzme ulogu u njihovom osnaživanju, kao i suzbijanju i prijavljivanju nasilja. Zahtijevamo da se stereotipi i predrasude prestanu uzimati kao otežavajuće okolnosti za žene, a olakšavajuće za muškarce, počinitelje nasilja. Podsjećamo državu Bosnu i Hercegovinu da je pravo vrijeme da ratifikuje Konvenciju protiv nasilja i uznemiravanja iz 2019. (br. 190) koju je donijela Međunarodna organizacija rada (ILO) s ciljem dodatne zaštite žena od nasilja i uznemiravanja (osobito seksualnog uznemiravanja) u oblastima rada.

PRIOPĆENJE

UDRUGA ZA ODRŽIVI RAZVOJ I ZAŠTITU OKOLIŠA U FEDERACIJI BIH

Adresa: Kralja Zvonimira 22, Mostar

e-mail uorzofbih@gmail.com, gsm 063 313 459

Udruga za održivi razvoj i zaštitu okoliša u Federaciji realizirala je projekt „Istraživanje položaja mladih u Federaciji BiH za 2020. godinu“.

Istraživanje je provedeno pod pokroviteljstvom Federalnog ministarstva kulture i sporta a Udruga je u istraživanje uložila vlastita sredstva. Iako je plan bio uraditi istraživanje u čitavoj Federaciji BiH zbog ograničenih finansijskih resursa istraživanje je provedeno u regiji koja obuhvata tri kantona: Hercegovačko-neretvanski, Zapadno-hercegovački i Livanjski.

Istraživanje je provela po prethodno odabranom izvođaču usluga – neovisna agencija za istraživanje javnog mijenja Promo iz Mostara.

Projekt je proveden u 19 općina i gradova navedene regije.

Anketirano je 560 osoba od čega su 52 % žene i 48 % muškarci.

Rezultat projekta je obrađeno i pripremljeno Istraživanje. U istraživanju se nalaze relevantni podaci koji će poslužiti donositeljima odluka u Federaciji BiH, zaduženim za mlade a to su proje svega Federalno ministarstvo kulture i sporta, Vlada i Parlament Federacije BiH.

Istraživanje se odnosilo na tri velike oblasti, sektora: Obrazovanje, Zapošljavanje te kultura i sport. Temeljem istraživanja dane su određene sektorske preporuke.

Sektor obrazovanja

Analizirajući dobivene rezultate razvidno je kako su stari i nagomilani problemi nastavili opterećivati obrazovni sustav i mlade. Najveći uočeni problemi koji su neusklađenost obrazovnog sustava sa potrebama realnog sektora i ekonomije u Federaciji BiH, BiH pa i šire u odnosu na Europsku uniju. Naime, školuju se i profiliraju kadrovi koji su nepotrebni na realnom tržištu rada dok se ne produciraju kadrovi za kojima postoji potreba i opravdanost ulaganja u obrazovanje. Uslijed toga mladi lako zaključuju da nemaju perspektive u svojim općinama i Federaciji i odlučuju se po najtežu opciju za državu a to je trajno ili privremeno napuštanje tj ekonomska emigracija. Svi rokovi za reformu sustava obrazovanja su prošli.

Obrazovni sustav je nužno odmah reformirati zajedno sa javnim i privatnim sektorom te akademskom zajednicom i nadležnim državnim tijelima napraviti moderan i optimalan sustav, utemeljen na realnim potrebama.

Nužno je integrirati praktičan rad u svim srednje i visokoškolskim ustanovama te ukinuti pripravnički staž kao relikv starih sistema i prepreku zapošljavanja mladih.

Pripravnički staž treba integrirati u praktičan rad tijekom školovanja (npr u zadnji semestar). S tim u vezi Federacija BiH mora nužno provesti reformu sustava po uzoru na uspješne modele iz zemalja okruženja i EU. Mlade je potrebno motivirati da se obrazuju jer su mnogi razočarani u sustav i nužno je povećati upisne kvote u srednje škole i na visokoškolske ustanove i podići stupanj obrazovanih mladih ljudi.

Nužno je poticati i financirati znanstveno istraživački rad i povezati ga sa sustavom visokog obrazovanja. Nužno je osigurati mobilnost mladih u obrazovanju i osigurati veći broj dostupnih stipendija i poticaja za učenike i studente.

Sektor zapošljavanja

Poznata je procjena relevantnih istraživanja, kako je stopa nezaposlenosti mladih u Federaciji BiH oko 60 %. Razlog visoke stope nezaposlenosti mladih je jednostavan, tj jasan, nedostatak novih radnih mjesta koji bi zaposlili mlade. S druge strane ne postoji društveni sustav zaštite nezaposlenih mladih.

Federacija BiH mora odmah donijeti dokument Omladinska politika koji bi uključivao program zapošljavanja mladih, temeljen na **realnim** potrebama i istraživanjima tržišta rada.

Sektor kulture i sporta

Nepostojanje sustava (bilo državnog bilo privatnog) koji bi afirmirao ovu oblast zapostavljaju vrijedne talente koje Federacija BiH ima u ovoj oblasti. Nepostojanje sustava, (Omladinske) politike prema mladima u oblasti kulture i sporta onemogućava praćenje i mjera koje se poduzimaju na unaprjeđenju stanja. Ne postoji institucionalni okvir i suradnja raznih razina vlasti koje se bave ovom problematikom. Financiranje programa i projekata kulture i sporta mladih, kao i udruga mladih je nedostatan i nije sustavno riješeno. Država mora pokrenuti vlastite potencijale i resurse i zajedno sa nevladinim sektorom afirmirati kulturu i sport kako bi se što više mladih i djece uključilo u kulturne i sportske aktivnosti.

Nužno je donošenje Omladinske politike iz oblasti kulture i sporta, te usvajanje programa djelovanja. Potrebno je omogućiti mladima besplatan pristup kulturnim i sportskim sadržajima (dvoranama), te poticati talente iz oblasti kulture i sporta. Svakako preporuka je da se proračuni i izdvajanja za kulturu i sport na nivou kantona i Federacije BiH moraju značajno povećati.

Istraživanje položaja mladih u Federaciji BiH može biti polazni temelj Vladi, Parlamentu i Ministarstvu kulture i sporta Federacije BiH, Ministarstvu obrazovanja za pripremu i donošenje dokumenta Omladinska politika, tj za izradu bilo kakvih sustavnih parcijalnih rješenja za pitanja mladih iz obrađenih sektora kao što su; kultura, obrazovanje, zapošljavanje. Na taj način, kada nadležne institucije počnu rješavati nagomilane probleme, početak će se popravljati standard i uvjeti života mladih, što će izravno pridonijeti poboljšanju životnih prilika mladih koji žive u Federaciji BiH, zaustavit će rapidan odlazak mladih i stvoriti preduvjete za povratak mladih u Federaciju BiH.

USAID / INSPIRE: Podrška aktivnostima LGBTQI zajednice u BiH



USAID
OD AMERIČKOG NARODA

Kroz Program podrške zaštiti ljudskih prava (USAID/INSPIRE), Američka agencija za međunarodni razvoj (USAID) osnažuje građane i vlasti u BiH kako bi unaprijedili zaštitu ljudskih prava te pružili bolje usluge i prilike za zapošljavanje marginaliziranim grupama u Bosni i Hercegovini.

USAID/INSPIRE nastavlja se na postignuća USAID-ovog Programa podrške marginaliziranim grupama (2015-2020). Ovaj program gradio je kapacitete nevladinih organizacija koje se bave pitanjima LGBTQI (lesbian, gay, bisexual, transgender, queer, intersex) zajednice za saradnju s općinskim vlastima i liderima u lokalnim zajednicama u organiziranju prve PRIDE parade u Bosni i Hercegovini (BiH) održane 2019.

godine. Program je pružio podršku zagovaranju sistemskih rješenja za probleme s kojima se suočavaju marginalizirane grupe. Marginalizirane grupe u BiH susreću se i dalje s velikim izazovima. Zato je ključno kontinuirano pružati podršku onima kojima je potrebna, među kojima su i članovi LGBTQI zajednice.

USAID/INSPIRE poziva nevladine organizacije registrirane u Bosni i Hercegovini (udruženja i fondacije osnovane prema zakonima o udruženjima i fondacijama u BiH) da dostave svoje projektne prijedloge u okviru komponente za pružanje Podrške aktivnostima LGBTQI zajednice u BiH.

Na Javni poziv ne mogu se prijaviti: javne ustanove, institucije vlasti, privredna društva, vjerske organizacije, politički subjekti, kao ni međunarodne nevladine organizacije koje nemaju registrirano svoje predstavništvo u Bosni i Hercegovini u skladu sa zakonima o udruženjima i fondacijama u BiH.

Sve projektne aktivnosti moraju se realizirati u Bosni i Hercegovini.

Projektne prijedlozi mogu se dostavljati za cjelokupni ili djelomični iznos sredstava potrebnih za implementaciju kandidiranog projekta.

Ukupni raspoloživi fond sredstava po ovom javnom pozivu iznosi 480.000 BAM. Minimalni iznos sredstava koja se traže od USAID/INSPIRE ne može biti manji od 30.000 BAM, a maksimalan iznos traženih sredstava ne može prelaziti 150.000 BAM. Trajanje projekta ne može biti kraće od 6 mjeseci ni duže od 24 mjeseca.

Sva pitanja koja se tiču ovog javnog poziva dostavljaju se isključivo putem e-mail adrese:

prijava@usaidinspire.ba (subject/predmet: 20.04.0-N2.1-261, Upit) do 26.2.2021. godine.

Od aplikanta se traži da do 5. 3. 2021. do 16.00 sati dostave nacrt projektnog prijedloga u elektronskom obliku, sa svim traženim priložima, nakon što se registruju kao organizacija (organisation) na online platformi za upravljanje grantovima APPLY. U sklopu aplikacije trebaju popuniti sve podatke o svojoj organizaciji i odabrati komponentu na koju apliciraju unutar programa USAID/INSPIRE, nakon čega će odmah dobiti automatski e-mail kao potvrdu o prijemu aplikacije. Nacrti projektnih prijedloga koji ne budu dostavljeni na navedeni način i do navedenog roka neće biti uzeti u razmatranje.

Napomena: Svi potencijalni aplikanti trebaju pristupiti registraciji na online platformi za upravljanje grantovima APPLY čim prije, kako bi se upoznali s uvjetima i tehničkim postavkama aplikacije, a putem linka: <https://KULT.smapply.io/prog/inspire>. Molimo vas da taj link spasite u svoje kratice (bookmarks) ako namjeravate aplicirati na USAID/INSPIRE sada ili u budućnosti, a detaljne instrukcije o procesu registracije možete pronaći na linku: <https://kult.smapply.io/res/p/tehnice-instrukcije/>.

Aplikanti se mole da pažljivo pročitaju tekst Javnog poziva prije nego što počnu s procesom apliciranja i prije nego što pošalju svoj projektne prijedlog.

Puni tekst javnog poziva možete preuzeti u PDF formatu na [ovom](#) linku.

Otvorene prijave za program Ja Preduzetnik

Da li su ti bliski termini: preduzetnik, start up, validacija ideje, biznis plan, finansijski plan, investicije, pitch, uspjeh, rast, formiranje tima? ... Kreirali smo program koji će vam Startup svijet približiti praktično uz najkompetentnije eksperte iz svake Startup oblasti i učiniti vas spremnim za tržište i investicije.

POZIV za NOVU "Ja Preduzetnik" GENERACIJU 2021 uspješnih preduzetnika/ca:

Ukoliko si mlada osoba 18 do 30 koja želi da se upusti u preduzetništvo, ili pak imaš tek formirani Startup tim, tvoja poslovna ideja osvaja srca okoline, iza tebe je iskustvo osobe koja je pokrenula biznis ili tek želiš da učiš osnove preduzetništva, "Ja Preduzetnik" je kreirao program koji je upravo za tebe. Pazi, mjesta su ograničena i biramo samo najbolje, zato požuri da ispuniš prijavnu [formu](#).

Garantujemo ti do sada najinovativniji program za mlade talente, preduzetnike i Startup-ove. Eksperte koji su u svojim branšama lideri, a vama će biti na raspolaganju svih 6 mjeseci programa. Startup i



preduzetničke teme koje su trenutno na tržištu najaktuelnije, i praktično znanje koje odmah možete primjeniti na trenutni ili budući biznis model. Mi biramo 50 mladih talenata iz cijele Bosne i Hercegovine. Svih 50 će imati tromjesečnu edukaciju kako bi kompletiralo svoje ideje i biznis modele, a samo 10 ulazi u finalno pitch takmičenje. Najbolje ideje će biti prezentovane cijeloj BiH, a pobjednici

dobijaju vrijedne nagrade.

Nije teško biti preduzetnik uz program “Ja Preduzetnik” zar ne?

Prepoznaješ se? Ti si osoba koja voli izazove? Tvoj tim treba mentorstvo i edukaciju? Želiš da tvoja ideja pobjedi na Startup takmičenju? Ti si preduzetnik? [Apliciraj odmah!](#)

Nikad nije kasno da kreneš u borbu za svoje želje, snove i ambicije. Znam da ti je želja da budeš preduzetnik čim si ušao na link, pa šta onda čekaš?

Rok za apliciranje je 25.02, izabrane učesnike objavljujemo 01.03.”

Prijaviti se možete [ovdje](#)

japreduzetnik.com

Drugi javni poziv za prijave lokalnih akcija

U okviru trogodišnjeg projekta “Misli o prirodi” koji implementira Centar za promociju civilnog društva (CPCD) uz potporu Švedske, Udruženje građana Fojničani (UGF), u suradnji i uz podršku općina Maglaj, Usora, Zavidovići i Žepče, raspisuje:

Drugi javni poziv za prijave lokalnih ekoloških akcija

na području navedenih općina koje pokriva “Eko HUB Maglaj”. U okviru ovog drugog, od ukupno tri, javna poziva tokom 27 mjeseci implementacije projekta “Eko HUB Maglaj”, planirana je podrška u opremi i materijalu, uključujući hranu i osvježenje, u vrijednosti do 500 KM po akciji, za najmanje 8 ekoloških akcija. Akcije će realizirati lokalni volonteri dok će nabavku opreme, materijala, hrane i osvježenja realizirati UGF. Prijave trebaju uključivati ekološke akcije koje će koristiti lokalnoj zajednici i koje će mobilizirati građane, osobito mlade, kroz volonterski rad na uređenju okoliša i zaštiti prirode. Tako će i osnovni kriteriji odabira najboljih prijava biti stupanj koristi akcije za lokalnu zajednicu, realitet predložene akcije odnosno potrebne opreme i materijala, broj uključenih volontera i održivost rezultata akcije.



Pravo prijave na ovaj Javni poziv ravnopravno imaju registrirane nepolitičke i nevladine organizacije, uključujući udruženja građana, sportske klubove i kulturna društva, te mjesne zajednice i neformalne grupe građana iz općina u kojima djeluje Eko HUB Maglaj (Maglaj, Usora, Zavidovići i Žepče). Svaki prijavitelj je za svoju akciju obavezan osigurati sudjelovanje najmanje 10 volontera.

Organizacije odnosno neformalne grupe građana koje budu imale najbolje prijave i budu odabrane u uži krug dužne su omogućiti UGF-u eventualnu dodatnu procjenu predložene akcije, odnosno organizacije ili grupe građana koja će se vršiti na lokalitetu planirane akcije. Samo organizacije odnosno grupe građana koje uspješno prođu ovaj proces procjene mogu dobiti podršku za realizaciju svoje akcije. Važna novost u ovom krugu javnog poziva je da prijave mogu biti podržane i potporom u znatno višoj vrijednosti ako komisija na terenu procijeni da se radi o lokalnoj ekološkoj inicijativi koja ima poseban potencijal i značaj.

U slučaju da je nositelj odobrene akcije neformalna grupa građana, obavezna je nabavljenu opremu donirati lokalnoj organizaciji ili instituciji po završetku akcije. Voditelji odabranih akcija su obavezni sudjelovati u jednodnevnom treningu koji će se, kao i sama ekološka akcija, realizirati u skladu s epidemiološkim mjerama. Prijave lokalnih ekoloških akcija se podnose isključivo popunjavanjem elektronskog obrasca na adresi:

<https://forms.gle/LcWD88PHUzx7S2h2A>

Rok za podnošenje prijedloga lokalnih ekoloških akcija je 14.2.2021. godine, do 24:00 sati. Nepravilne, nepravodobne ili nepotpune prijave neće biti uzete u razmatranje. Za eventualna dodatna pitanja možete kontaktirati UGF i Eko HUB Maglaj putem telefona 063/029-966 ili e-maila: info@ugf.ba



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba

Mjesečni bilten uređuje
Omladinski resursni centar - ORC
Tuzla

Urednik Biltena:

Mirela Biković

Prevod Biltena na engleski: **Adnan Karamujić**

WEB stranica Mreže:

www.omladina-bih.net

Mejling lista Mreže:

posta@omladina-bih.net

Webmaster:

emir.delalic@gmail.com